

8. august 2016

Inatsisartut suleriaasianni § 33 naapertorlugu Inatsisartut aalajangiiffigisassaattut siunnersuut imaattoq matumuuna saqqummiuppara:

**Sulisartut sunniuteqaqataaffiginngisaannik suliffeqarfiit aaqqiissutaagallartumik sivikitsumillu sulinermik unitsitsigallarnerini sulisartut suliffeqarfimminiit angerlartitaagallartarnerat pillugu aalajangersakkat Nunatsinni suliffeqarfinnut tamanut tunngatitaalernissaat qulakkeerniarlugu suliffeerunnermi ikiorsiissutit pillugit inatsisartut inatsisaata nr. 2, 15. maj 2014-imeersumi § 4-ap allannguutissaanik Naalakkersuisut kingusinnerpaamik UPA2017-imi Inatsisartunut saqqummiusseqqullugit Inatsisartut aalajangiiffigisassaattut siunnersuut. Ilanngullugu siunnersuutigineqarpoq inatsisini allani attuumasuni oqaasertatigut naqqiisoqassasoq, qulakkeerniarlugu Suliffeqarfiit aaqqiissutaagallartumik sivikitsumillu sulinermik unitsitsigallarnerini sulisartut suliffeqarfimminiit angerlartitaagallartarnerat suliffeqarfinnut tamanut atuuttussangortillugu.**

(Inatsisartunut ilaasortaq Suka K. Frederiksen, Siumut)

#### **Tunngavilersuut:**

Suliffeerunnermi ikiorsiissutit pillugit inatsisartut inatsisaat nr. 2, 15. maj 2014-imeersoq ukiuni pingasunngulersuni atuutereersorlu paasinarsisimavoq, inatsimmi immikkoortuni arlalinni naleq-qussagassaqartoq inatsit pineqartoq nunatsinni suliffeqarfinni assigiinngitsuni tamani sulisartunut iluaqutaasumik atuutsinneqarsinnaassappat.

Sulisartut pineqartut siusinnerusukkut annertussusileriikkanik ikiorsiissutinik malittarisassat naapertorlugit tunineqartarsimapput kingusinnerusukkullu suliffeerunnermi ikiorsiissutit malittarisassartai atuutilersimallutik. Tamanna atorunnaarsitaasimavoq, ulluinnarni allaffissornikkut periutsit allangortinnerisigut aammalu Inunnik Isumaginninnermut Maalaartarfiup aalajangermagu allaffissornikkut periuseq inatsimmut naapertuuttoq.

Soorlu inatsimmi § 4 ima oqaasertalik, issuaaneq aallartippoq, ”Tunisassiornermik unitsitsineq tas-saavoq tunisassianik amigaateqarneq, maskiinanik ajutoorneq, silarlunneq imaluunniit pissutsit assingusut siumut ilisimaneqanngitsut peqqutigalugit tunisassiornermik unitsitsineq, taassumalu malitsigisaanik sulisunik angerlartitsisoqarsinnaalluni. Angerlartitsisarneq pillugu malittarisassat taamaallaat nunami tunisassiorfinnik atuinermi atorineqartarput” issuaaneq naavoq.

§ 4. Tunisassiornerinnarmut tunngatikunnaarlugu siunnersuutigineqarpoq suliffeqarfinnut tamanut atuutsinneqarsinnaasunngorlugu nutaamik oqaasertalerneqassasoq, taamaalilluni angerlartitsisar-neq pillugu maleruagassat suliffinni tamani atuutsinneqalissapput aaqqiissutaangallartumik sivikitsumillu sulinermik unitsitsigallarnerni.

Inatsimmi § 6 Imm. 2. aamma Imm. 4. tamarmik tunisassiornerinnavimmut tunngatinneqartut oqaasertamikkut naleqqussaavigineqartariaqarput suliffeqarfinnut assigiinngitsunut tamanut tunngatitsineq qulakkeerniarlugu.

§ 4 imm. 2 nutaaq imatut allassimalissaaq:

“Imm. 2: Suliffeqarfiit nunamiittut eqqiaasunik sullissinermilu sulisoqartut pissutsit pissutigalugit angerlartitaasarnerat imm. 1-mi nassuiaatigineqartoq aammalu sulinermik unitsitsigallarneq, pilersaarutaasumik sulinermik unitsitsineq ilanngullugu tamatumani pineqartoq tassaavoq sulineq sulisunit sunnerneqarsinnaanngitsumik unitsinneqaraangat.

§ 6 imm. 2 imatut oqaasertalerneqassaaq:

Imm. 2.: Inuit, tunisassiornerup uninnerani angerlartitaasut imaluunniit sulineq unitsinneqartillugu, § 4 naapertorlugu aammalu suliffeqarnerup iluani suleriaannaasut imaluunniit ilisimasatigut allatigulluunniit qaffassarneqartut, taakkua suliffeerunnermi ikiorsiissutinik pisinnaatitaapput inatsisartut inatsisaat naapertorlugu. Angerlartitaaneq sulisitsisumiit allakkatigut uppersarneqassaaq tamannalu nittartakkatigut aamma nalunaarutigineqarsinnaavoq.”

Ilanngullugu siunnersuutigineqassaaq pinngitsoorani inatsimmut nassuiaatini naqqiissuteqartoqassasoq Inatsisartut inatsisitaavanni §4 imm. 2-mi aammalu § 6 imm. 2-mi, ersarissumik naqissuserneqartillugu, allannguutini taamaallaat pineqartut nunami suliffeqarfiusuni sulinermik unitsitsigallarneq eqqiaasutut- sullissisartutullu suliaqartunut aammalu sulinermik unitsitsineq sulisartunit sunnerneqarsinnaanngikkaangat.

#### **Pisortanut aningaasaqarnikkut allaffissornikkullu kingunerisassai:**

Siunnersuut allaffissornerunermik kinguneqassanngilaq, siornatigut allaffissornikkut aaqqissuus-sineq tunngaviatigut ingerlaqqiinnassammat suliffeerunnermi ikiorsiissutit ukiorpassuarni ingerlanneqareermata. Allannguutissatut siunnersuutit inoqarfinni minnerusuni 50-100-nut inulinni sunniuteqarnerussapput. Siunnersuut akuerineqarpat kommuninut annerpaamik 4.220.000,00 kr.-nik naleqarsinnaavoq.

#### **Inuussutissarsiornermut aningaasaqarnikkut allaffissornikkullu kingunerisassai:**

Siunnersuut allaffissornikkut sunniuteqassanngilaq taamaallaat sulisitsisut angerlartitsinermik allakkatigut uppersaassapput.

#### **Innuttaasunut aningaasaqarnikkut allaffissornikkullu kingunerisassai:**

Siunnersuutip matuma akuerineqarneratigut taakku inatsimmi ilaatinneqareersut saniatigut sulisartunut ilaatinneqalersussanut iluaqutaassaaq.